



Majlis Ugama Islam Singapura

Khutbah Jumaat

17 Jun 2016 / 12 Ramadan 1437H

Mencapai Objektif Di Sebalik Ibadah Puasa

الْحَمْدُ لِلَّهِ الَّذِي جَعَلَ رَمَضَانَ شَهْرًا مُبَارَكًا. وَفَرَضَ فِيهِ الصِّيَامَ
وَأَعَدَّ فِيهِ فَضْلًا كَبِيرًا وَأَجْرًا عَظِيمًا. وَأَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ
صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا أَيُّهَا الْمُؤْمِنُونَ، اتَّقُوا اللَّهَ، أَوْصِيكُمْ وَإِيَّايَ بِتَقْوَى
اللَّهِ، فَقَدْ فَازَ الْمُتَّقُونَ.

Sidang Jumaat yang dirahmati Allah,

Dengan kemuliaan bulan Ramadan ini, marilah bersama-sama kita menanam tekad untuk berusaha dan meningkatkan ketakwaan kita kepada Allah. Semoga Allah s.w.t. bakal menerima segala amal ibadah kita. Amin!

Saudaraku,

Allah s.w.t. menjelaskan dalam Al-Quran objektif utama disyariatkan ibadah berpuasa. Sesuai dengan firman Allah s.w.t. dalam surah Al-Baqarah ayat 183:

يَأْتِيهَا الَّذِينَ ءَامَنُوا كُنِبَ عَلَيْكُمْ الصِّيَامُ كَمَا كُنِبَ عَلَى
الَّذِينَ مِن قَبْلِكُمْ لَعَلَّكُمْ تَتَّقُونَ ﴿١٨٣﴾

Yang bermaksud: “Wahai orang-orang yang beriman, telah diwajibkan ke atas kamu berpuasa sepertimana diwajibkan ke atas orang-orang sebelum kamu, supaya kamu bertakwa.”

Akan tetapi saudaraku, apakah yang dimaksudkan “dengan mencapai darjat ketakwaan” dalam ayat yang baru dibacakan sebentar tadi? Apakah ciri-ciri orang yang bertakwa?

Mari kita renungkan ayat 133-134 Surah Ali-Imran:

﴿١٣٣﴾ وَسَارِعُوا إِلَىٰ مَغْفِرَةٍ مِّن رَّبِّكُمْ وَجَنَّةٍ عَرْضُهَا السَّمَاوَاتُ وَالْأَرْضُ
أُعِدَّتْ لِلْمُتَّقِينَ ﴿١٣٣﴾ الَّذِينَ يُنْفِقُونَ فِي السَّرَّاءِ وَالضَّرَّاءِ وَالْكَاظِمِينَ الْغَيْظَ
وَالْعَافِينَ عَنِ النَّاسِ ۗ وَاللَّهُ يُحِبُّ الْمُحْسِنِينَ ﴿١٣٤﴾

Yang bermaksud: “Dan bersegeralah kamu kepada keampunan dari Tuhanmu dan kepada syurga yang luasnya seluas langit dan bumi yang disediakan untuk orang-orang yang bertakwa, (yaitu) orang-orang yang menafkahkan (hartanya), baik di waktu lapang mahupun sempit, dan orang-orang yang menahan amarahnya dan memaafkan (kesalahan) orang. Allah menyukai orang-orang yang berbuat kebajikan”.

Ayat-ayat ini menekankan kepada kita bahawa erti ketakwaan bukanlah bermaksud kita hanya menyendiri dan memikirkan keselamatan diri sendiri sahaja. Bahkan ayat ini mengingatkan

kita bahwa semakin kita memperbaiki hubungan dengan Allah, ia seharusnya menjadikan kita orang yang semakin bersemangat untuk membawa harapan dan membantu mereka yang memerlukan di sekeliling kita. Orang yang bertakwa bukanlah orang yang hanya duduk di tikar sembahyang atau bertasbih tanpa henti. Dia akan bertasbih sambil berusaha dengan tulang empat keratnya untuk membantu yang berada dalam kesempitan. Dia akan berzikir kepada Allah tatkala dia menjalin hubungan baik sesama manusia. Senyuman dan ucapan manis yang dipersembahkan kepada jiran dan teman adalah ibadahnya. Begitulah orang yang bertakwa, baik hubungannya dengan Allah tetapi juga semakin baik hubungannya sesama manusia.

Perhatikan sabda Nabi s.a.w:

لَا يُؤْمِنُ أَحَدُكُمْ حَتَّى يُحِبَّ لِأَخِيهِ مَا يُحِبُّ لِنَفْسِهِ

Yang bermaksud: *“Tidak sempurna keimanan kamu, sehinggalah dia menyukai untuk saudaranya, apa yang dia sukai untuk dirinya sendiri”*. [Hadith riwayat Imam Al-Bukhari dan Muslim]

Perhatikan saudaraku, bagaimana Nabi s.a.w. mengaitkan keimanan dengan menjaga hubungan sesama insan. Imam An-Nawawi berpendapat bahawa yang dimaksudkan dengan “saudaramu” dalam hadith tersebut adalah saudara seinsan kita, tanpa mengira bangsa, agama dan kecenderungan.

Saudaraku,

Bulan ini adalah bulan mulia, bulan kebaikan, bulan melaksanakan *Al-Ma'ruf*. Ramadan merupakan waktu yang amat sesuai untuk kita memastikan bahawa tali perhubungan kita bersama masyarakat ini, kekal terpelihara. Inilah yang dimaksudkan sebagai mencapai darjat ketakwaan. Ketakwaan yang mendorong kita untuk mencari peluang melaksanakan kebaikan, untuk menyebarkan keihsanan, dan saling membantu sesiapa yang memerlukan.

Alhamdulillah masyarakat kita telah lama menghidupkan semangat ini dalam diri mereka. Kita menyaksikan tradisi serta kebiasaan yang baik dilaksanakan oleh ibu-ibu kita, dengan berkongsi makanan dengan jiran tetangga. Ramai pula terdorong untuk melaksanakan amal kebajikan, dengan membantu fakir miskin, menyediakan juadah berbuka dan sebagainya, sepanjang Ramadan.

Saudaraku,

Sekiranya kita memerhatikan keseluruhan ibadah yang kita laksanakan sepanjang Ramadan, ia sebenarnya bertujuan untuk membina ketakwaan dalam diri. Kita menahan kelaparan dan dahaga di siang hari, sehingga dapat merasakan kesusahan golongan yang kurang berkemampuan. Begitu juga perintah untuk mengeluarkan zakat fitrah pada bulan ini. Semuanya bertujuan agar kita berkongsi kesenangan dengan

golongan yang memerlukan. Mudah-mudahan dengan demikian Allah bakal meluaskan pintu kebaikan untuk kita sepertimana kita telah melapangkan kesempatan orang lain.

Saudaraku,

Pastikanlah tidak terdapat unsur pembaziran dalam pemakanan dan perbelanjaannya. Sama ada ketika berbuka ataupun ketika berbelanja rumah. Makanan yang ditempah berlebihan, akhirnya terbuang, sedangkan masih ada lagi, pada saat ini detik ini, pelarian yang tiada tempat berteduh, tiada pemakanan dan pakaian yang sempurna. Masih ada keluarga yang mungkin berjiran dengan kita tetapi tidak dapat makanan yang sedap di atas meja hidangan mereka. Daripada kita berbelanja lebih daripada yang diperlukan, bukankah lebih baik kita ketepikan jumlah itu untuk didermakan untuk kegunaan mereka sehingga selepas Ramadan.

Ketakwaan yang sebenar adalah apabila hati kita mula membisikkan perasaan seperti itu. Ini kerana hati yang bertakwa tidak sanggup melihat orang lain berada dalam kesempitan sedangkan kita bersenang-lenang.

Saudaraku sekalian,

Rebutlah peluang Ramadan ini untuk berusaha mencapai darjat ketakwaan tersebut. Untuk membina hubungan dan keihsanan kita kepada Allah s.w.t. di waktu yang sama membina

keihsanan kita sesama insan. Jadikan Ramadan kali ini, Ramadan yang mengubah diri, Ramadan yang berjaya membentuk peribadi dan pekerti. Ramadan yang membawa keampunan dan kemaafan buat diri kita. Kerana Ramadan seharusnya meninggalkan kesan dalam diri, dan bukan hanya berlalu pergi tanpa apa-apa kesan dan hasil.

Nabi s.a.w. pernah mengingatkan kita, tentang insan yang dianggap amat rugi. Kerana dia didatangi bulan Ramadan tetapi dia masih tidak diampunkan, masih tidak mendapat kebajikannya. Dia masih lalai dan bergelumang dengan noda dan dosa. Sedangkan Ramadan adalah bulan rahmat dan keampunan.

Semoga dalam usaha kita mengejar setiap kelebihan di dalam bulan Ramadan ini, kita dapat berkongsi keindahan tersebut dengan ahli keluarga kita, sekaligus membina keluarga yang penyayang dan harmoni, yang taat kepada Allah s.w.t. Mudah-mudahan di dalam bulan di mana terkabulnya doa-doa kita, Allah mengkabulkan harapan setiap hati. Marilah saudaraku kita menadah tangan, bermohon kepada Allah s.w.t. pada saat dan detik yang mulia ini:

اللَّهُمَّ لَكَ الْحَمْدُ عَلَى مَا يَسَّرْتَ لَنَا مِنْ صِيَامٍ وَقِيَامٍ، وَلَكَ الشُّكْرُ عَلَى مَا أَعْطَيْتَنَا مِنَ النِّعَمِ. اللَّهُمَّ ارْحَمْنَا بِالْقُرْآنِ، وَاجْعَلْهُ لَنَا إِمَامًا وَنُورًا

وَهْدَىٰ وَرَحْمَةً، اللَّهُمَّ ذَكَّرْنَا مِنْهُ مَا نَسِينَا، وَعَلَّمْنَا مِنْهُ مَا جَهِلْنَا، وَارزُقْنَا
تِلَاوَتَهُ آنَاءَ اللَّيْلِ وَأَطْرَافِ النَّهَارِ، وَاجْعَلْهُ لَنَا حُجَّةً يَا رَبَّ الْعَالَمِينَ.

Allahumma ya Rahman, ya Rahim. Jadikanlah Al-Quran sebagai cahaya penerang hati-hati kami. Penunjuk perjalanan hidup kami. Penghibur duka nestapa kami. Pengubat segala penyakit kami. Penebus segala dosa-dosa kami. Dan jadikan kami di sisiMu sebagai Ahli Al-Quran yang Engkau Redhai.

Allahumma ya Khabir, ya Alim. Ya Allah, kami bermohon kepadaMu, Kurniakan ke atas kami cinta membaca kitab suciMu. Cinta untuk memahami isi kandungan kitab suciMu. Cinta melaksanakan segala titah perintahMu. Takut akan siksaan azabMu. Mengharap akan maghfirahMu. Amin, Ya Rabbal Alamin.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.